

Thursday, November 27, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

FOOD SAFETY

Nimin khan Mizoram Health & Family Welfare Department hnuaiia Food and Drugs Administration (FDA) bul tumin Lungleia School Education Complex Conference Hall-ah Lunglei District chhunga hralh chhuah tur ei leh in siamtute tan danin a pawmpui theih tura thianghlim leh hrisel zawka ei in siam dan zir hona, "Basic FoSTaC (Food Safety Training and Certification)" hun buatsaih a ni.

Lunglei District Designated Officer (Food Safety) Pu John Laldinglana'n hun kaihruaiin, hun buatsaih chhan a sawi fiah a. Pi V. Nagalakshmi (Smart Management Company) chu trainer a ni a. Chawhmaah ei in siamtu (manufacturer) — chhang siam, theitui siam, chow siam leh a dangte atangin mi 115-in training hi chhimin, chawnuah thingpui dawr (tea stall) siam, chaw sem (catering), khualbuk (hotel) leh ei inna hmun (restaurant) neitute atangin mi 85-in training hi an chhim thung a. Zawnha leh chhanna leh sawi hona hun te hman a ni bawk.

India rama ei leh in lam kaihhraina duangtu lu ber, Food Safety and Standards Authority of India (FSSAI) chuan kum 2018 atang khan FoSTaC training hi a buatsaih tan a. Ei in siamtu leh sumdawnge tan an sumdawnna azirin training course siamin, chumia training pe tur chuan empanelled trainer a ruat thin a ni.

He training-a kalte hi FSSAI chuan Certification a pe vek dawn a. FoSTaC training certificate nei lo tan FSSAI phalna (license) a tihnun (renew) theih tawh dawn loh avangin he training course hi a pawimawh hle a ni.



SCIENCE CONGRESS

Science Teachers Association Mizoram (STAM) leh Samagra Shiksha, Mizoram State buatsaih State Level Children's Science Congress vawi-33na, ni 2 awh chu vawiin atang khan Directorate of School Education Conference Hall ah tan a ni.

District Sawm leh pakhat atangin naupang scientist chu an thil zirbing Science Project 47 hmangin an intihsiak a. Dr. Lalrinthara Pachuau, Dr. K. Vanlaldinpuia leh Dr. Albana L. Chawngthu, Pachhunga University College-a zirtirtute'n an endik a. Children Science Congress thupui hi "Science for Sustainable Development and Community Well-being" hman a ni. Anmahni kaihruaitu zirtirtute kaihhraina in naupang scientist ten project tha tak tak an nei hi STAM hrulaitute chuan lawmawm an ti hle a, heng an thil zirbingte hi tangkai taka hman theih an beisei a ni.

Naupang Scientist mipa 36 leh hmeichhia 54, avaiin 90 Science Congress ah hian an tel a. Children's Science Congress hi naktuk, November ni 28 tlai dar 3 ah a tiak ang.



PRESS TOUR

Press Information Bureau (PIB) Kochi buatsaih chanchinbumite lo zin chuan India hmarchhak state zingah Mizoram an fang mek.

PIB Kochi buatsaiha chanchinbumi lo zinte hian Thawhlehi khan rel hmanga Sairang rel chawlhmunrawn thlengin Sairang rel chawlhmun a Station Master Guddu Singh chuan a lo dawng sawng a. He rel chawlhmun pawimawhzia, state dangte nena intlawh pawhna awlsam leh rang zawk atana a tangkai dan bakah Mizoram ei leh bar lama hmasawna a thlen theih dante a hrilhfiah a ni. Aizawlah chuan Museum an tlawh a, Mizo hnam ziarang leh nunphung hausa tak chanchin an zir chu hlawk an inti hle. Thenzawl khua pawh thawh an tum thu an sawi a ni.



POCSO

Vawiin khan Pu R. Vanlalena, Kolasib district Fast Track Court judge chuan Vanlalruata (67) Kolasib-a mi chu hur sualna lam hawi a hmeichhe naupang kum 8 mi a lo khawih chingpen avangin kum 10 chhung tang tur leh cheng 7,000 chawi turin thupek a chhuah.

He thubuairawn lan chhuah dan chu hetiang hi a ni. Kum 2019 January ni 15 khan hmeichhe naupang pakhat chuan a serh a nat thu leh putar pakhatin a serh a khawih sak thu a sawi chhuah chu a pa, Kolasib Veng pakhata awm chuan Kolasib Police Station ah a tukah FIR a theh lut a. He thil thlen hun lai tak hi naupang chuan sawi thei chiah tawh lo mahse kum 2018 laihawl vel kha ni a hriat a ni. He pawikhawihna hi Kolasib Police te chuan chhui zui nghalin pawikhawihtu Vanlalruata chu an man nghal a. Protection of Children from Sexual Offence Act, 2012 hmangin thubuai ziahluh a ni. Hmeichhe naupang hi Doctor-in a endikna a hmuh danin hmeichhiat-mipat kaihnawihakhawih chingpen ngei a ni a ti a. Police Officer ten thubuai chhui hna an thawh zawh hnuah report kimchang (charge sheet) chu Kolasib Fast Track Court-ah an theh lut a, Court chuan kum 2021 November ni 17 daihtawh khan thubuai hi rel zo tawhin pawikhawihtu Vanlalruata chu kum 10 chhung Jail tang tur leh pawisa pawh Rs. 5000/- chawi turin a lo ti tawh a ni.

Thiam loh chantir tak Vanlalruata hian a chungchang thu Kolasib Fast Track Court rorel danah lungawi lovin Gauhati High Court ah a zualko a. Gauhati High Court, Aizawl Bench chuan he thubuai hi a bul te atanga rel tha leh vek turin Judge, Fast Track Court, Kolasib chu kumin July ni 29 khan arawn hriattir a, thla 6 chhunga rel fel vek turin a hriattir tel bawka ni.

He thubuai rel that leh a nih chhung hian thu hretu 7 thu zawh an ni a. An zingah hian a chhuitu pahnih leh thuhretu dang naupang nu leh pa leh midangte bak ah Medical Officer, Aizawl lama sawn tawh chu biakhmuhtheih hmanga thu zawhfiah a ni. Thuhretute thu sawi atang hian Judge Pu. R. Vanlalena chuan thu tlukna siamin Vanlaruata chuan hmeichhe naupang kum tling lo chu hursualna lam hawiin lo khawih chingpen ngei tawh a ni, tiin thiam loh a chan tir ta a ni.



POLLUTION

Mizoram Pollution Control Board chhinchhiah danin, kumin October thla a lirthei khu endik zat chu a vai a belkhawmin 8,354 a tling.

MPCB-a thawktuten Akashvani News Aizawl an hrilh danin, lirthei khu endik 8,354 zinga 77-te chuan endikna an paltlang zo lo va, lirthei khu endik zingah hian two wheeler tam berin 5,883 endik a ni. Kum 2024- 2025 sorkar tangka kum

chhungin Mizoram pumah lirthei 72,097 endik a ni a, heng zingah hian lirthei 1,078 te chuan endikna an paltlang zo lo bawk.

MPCB hotute sawi danin, lirthei khu endikna hi Aizawlah hmun nga MINECO, Hlimen, Rangvamual, Silaimual leh Zemabawkah te a awm a, Transport department hmalakna in Durtlanga Common Services Center awm chuan lirthei khu an endik theih thu leh Lunglei Lunglawn leh Rahsi Vengah te lirthei khu endikna hi bun a nih tawh thu an sawi bawk.

Kan correspondent report i lo ngaithla ang :

